

陳脩園醫書廿一種

亥21

46(2)219



傷寒醫方
訣串解

光社

松如公遺書

郊祖燭煥



光緒十八年上海圖
書集成印書局印



南京中醫藥大學圖書館版權所有

傷寒醫訣串解者長樂陳修園先生晚年所編集也惜六篇之中尙缺其一以其未成書故不及付梓其門徒猶子陳道著有盧扁風閩之名醫也既能學先生之學又能承先生之志日嘗手披而祕藏之復體會其遺意而敬續一篇以補其缺合成六篇而篇帙遂成茲修園古矣其猶子道著亦古矣閩中林子肅葦專心衛世於舊書肆中檢出修園先生註解葛可久十藥神書一卷購而珍存之并恐此二種沒而不彰因細加讐校韻而錄之欲與兩先生傳名兼以傳世值余奉命巡撫全閩因舊疾復起探知林子精於療治常勞診視論及閩中名醫林子以陳修園陳道著兩先生對敬以修園先生所著南雅堂十一種醫書見示且余本善病人也又耳熟是書久矣適林子復以傷寒醫訣串解手錄一通乞序於余余不敏每兢兢官守尙恐才不足以經世何暇論及衛世然串解實補傷寒淺註所未備不可以無傳若再附以十藥成書註解合而刻之庶可以作岐黃家祕本矣今之術岐黃者果能默會精審互相參校其裨益良不淺也姑就林子所述其緣起爲之弁數語於簡端云爾

咸豐丙辰秋九月望後三日福建巡撫呂佺孫書

彙集傷寒淺註凡三百九十七法依法條晰期於明白易曉而又慮學者未能融會貫通而得其要旨也
不揣固陋復爲綜貫衍釋名曰傷寒醫訣串解其於疑心細微之處抉剔詳辨頗費苦心修圖老矣敢謂
於此道三折肱然有志之士誠能卽此紬繹其端緒推尋其綱領而不眩於似是而非未必非濟國活人
之一助也閩長樂陳念祖修圖識



傷寒醫訣串解目錄

卷一

太陽篇

卷二

陽明篇

卷三

少陽篇

卷四

太陰篇

卷五

少陰篇

卷六

厥陰篇



傷寒醫訣串解卷一

閩長樂陳念祖修園著

受業姪道著纂集
東治林壽萱校訂

太陽篇第一 太陽爲寒水之經主一身之表

何謂太陽經證曰頭痛項強發熱惡寒是也有虛邪實邪之辨 脈緩自汗惡風爲虛邪宜桂枝湯如八九日過經不解如瘧狀面熱身癢以其不得小汗故也宜桂枝麻黃各半湯因前此未汗不得不發其汗因日數頗久故小發其汗 如服桂枝湯大汗出後形如瘧日再發者以餘汗未盡故也宜桂枝二麻黃一湯大汗之後不得再行大汗之法而餘邪未盡不得不從汗而竭之但藥品宜輕耳 脈浮緊無汗惡寒爲實邪宜麻黃湯 如無汗煩躁者加石膏薑棗名大青龍湯 如乾嘔而欬去杏仁加五味乾薑半夏細辛芍藥名爲小青龍湯此二湯卽麻黃湯之加減總不出麻黃湯之範圍此二法治表中之表也何謂太陽腑證曰表邪不去必入於裏膀胱爲表中之裏也有蓄水蓄血之辨 太陽證其人口渴煩躁不得眠脈浮小便不利水入卽吐爲膀胱蓄水證宜五苓散 太陽證其人如狂小腹鞭滿小便自利脈沈爲膀胱蓄血證宜桃仁承氣湯此二法治表中之裏也

何謂太陽變證曰汗下失宜從陰從陽之不一也 不應下而下之續得下利清穀身疼痛宜四逆湯以

救清穀之裏又以桂枝湯以救身疼痛之表 病發熱頭痛脈反沈若不瘥身體疼痛當救其裏宜四逆湯 大汗大下利而厥冷者四逆湯主之 太陽病發汗太過遂漏不止其人惡風小便難四肢微急難以屈伸桂枝加附子湯主之 太陽病發汗太過動其榮血而衛邪反內伏其人仍發熱心下悸頭眩身瞤動振振欲擗地者真武湯主之 以上言汗下太過傷正而虛其陽陽虛則從少陰陰化之證多以太陽少陰爲表裏也

陽盛於內誤服桂枝湯大汗出後大煩大渴不解脈洪大者白虎加人參湯主之 傷寒若吐若下後七八日不解熱結在裏表裏俱熱時時惡風大渴舌上乾燥而煩欲飲水數升者白虎加人參湯主之 傷寒不大便六七日爲裏證頭痛發熱爲表證外不解由於內不通也下之裏和而表自解矣與承氣湯病人煩熱汗出則解又如瘧狀日晡所發熱屬陽明也 脈實者宜下之與大承氣湯脈虛者宜發汗與桂枝湯發汗後惡寒者虛故也不惡寒但熱者實也當和胃氣與調胃承氣湯 太陽病未解脈陰陽俱停停者沈滯不起也陰陽者尺寸也先振慄汗出乃解但陽脈微者先汗而解但陰脈微者下之而解若欲下之宜調胃承氣湯按此脈微卽上文脈停也 以上言汗下失宜熱熾而傷其陰陰傷則從陽明陽化之證多以太陽陽明遞相傳也

何謂發汗利水爲治太陽兩大門曰邪傷太陽病在寒水之經驅其水氣以外出則爲汗逐其水氣以下出後爲黃涎蓄水前爲小便長 太陽爲寒水之經邪之初傷必須發汗麻黃湯發皮膚之汗桂枝湯發

經絡之汗葛根湯發肌肉之汗小青龍湯發心下之汗大青龍湯發其內擾胸中之陽氣而爲汗此發

汗之五法也若汗之而不能盡者則爲水水在心下乾嘔而欬宜小青龍湯發熱而煩渴欲飲水水入

卽吐名曰水逆宜五苓散汗後心下痞硬乾噦食臍脇下有水氣腹中雷鳴下利者病勢雖在腹中而

病根猶在心下宜生薑瀉心湯此水氣在上焦在上者汗而散之也若妄下之後自心上至小腹硬滿

而痛不可近水與氣所結脈遲名大結胸宜大陷胸湯若項亦強如柔痙之狀宜大陷胸丸蓋病勢連於下

者主以湯病勢連於上者主以丸是也若其結止在心下按之始痛脈浮滑名小結胸邪氣尙在脈絡

宜小陷胸湯若無熱證名寒實結胸宜三物白散若心下痞鞭滿引脇下痛乾嘔短氣汗出不惡寒三

焦升降之氣阻格難通宜十棗湯此水氣在中焦中滿瀉之於內也若頭痛項強翕翕發熱無汗心下

滿微痛小便不利者因膀胱之水不行榮衛不調不能作汗宜以桂枝去桂加茯苓白朮湯治之是水

氣在下焦在下者引而竭之是也

內經云太陽之上寒氣治之所謂本也本之下中之見也見之下氣之標也又曰太陽從本從標又曰太

陽爲開又熱病論曰傷寒一日巨陽受之故頭項痛腰脊強傷寒論云太陽之爲病脈浮頭項強痛而惡寒 又云太陽病發熱汗出惡風脈緩者名爲中風 又云太陽中風陽浮而陰弱陽浮者熱自發陰弱者汗出嗇嗇惡寒淅淅惡風翕翕發熱鼻鳴乾嘔者桂枝湯主之 又云太陽病頭痛發熱身疼腰痛骨節疼痛惡風無汗而喘者麻黃湯主之 太陽主一身之表六經中最外一層故表病俱屬太陽但有表中之表病在肌腠則有汗宜桂枝湯病在膚表則無汗宜麻黃湯兩法用之得當一劑可愈又有脈微惡寒面色反有熱色而身癢是邪欲出而未得遽出必得小汗而解宜桂枝麻黃各半湯又有服桂枝湯大汗出後形如瘧日再發是肌病兼見表病宜桂枝二麻黃一湯是二方卽上兩法之佐也然二方能治肌腠膚表之病不能治經輸之病太陽之經輸在背內經云邪入於輸腰背乃強論中以項背強八八無汗惡風用葛根湯項背強八八反汗出惡風用桂枝加葛根湯二方亦上兩法之佐也但兩法俱是太陽本寒之證故方中取用辛熱之品若太陽標熱之證自汗證不得選用桂枝湯宜用芍藥甘草湯以各證與桂枝證無異惟腳攣急獨異是太陽之標熱合少陰之本熱之病也無汗證不得用麻黃湯宜用麻杏甘膏湯以各證與麻黃證相似惟初起口渴發熱而無惡寒或發汗已身灼熱不似論雖另別爲溫病風溫之證然節首冠以太陽病三字蓋指太陽之標熱而言明明爲一隅之舉不讀內

經不能解也其云桂枝二越婢一湯爲標內陷於裏陰而化熱故熱多寒少而脈微弱論曰無陽言無在表之陽也論曰不可發汗言不可發太陽之表汗也故用此湯直從裏陰而外越之也此又可借用爲上兩法之佐也然太陽爲表而亦有裏膀胱卽太陽之裏也如太陽證發熱無汗而心下滿微痛小便不利不宜取汗宜桂枝去桂加茯苓白朮湯令小便利則愈又有發汗後脈浮小便不利微熱消渴之證又有中風發熱六七日不解而煩爲表證渴欲飲水爲裏證論名曰表裏證水入則吐論名曰水逆證兩證俱宜五苓散多飲煖水以出汗此表中裏證之治法也至若大青龍湯因脈浮緊身疼痛不汗出而煩躁爲麻黃證之重者而設小青龍湯因表不解水停心下而欬噎變大青龍湯之大寒大散而爲發汗利水之劑卽是麻黃湯之加減總不出麻黃湯之範圍卽若桂枝去芍藥湯因桂枝證誤下脈促胸滿而設桂枝去芍藥加附子湯又因前證脈不見促而見微身復惡寒而設桂枝加附子湯因發汗太過遂漏不止惡風小便難四肢微急難以屈伸而設此因大汗以亡陽因亡陽以脫液取附子以固少陰之陽固陽卽所以止汗救液也推之汗後病已解復煩及桂枝證初服桂枝湯反煩不解刺風池風府却再與桂枝湯則愈其用甚廣總不出於桂枝證頭痛發熱汗出惡風八個字之外須知太陽治法不外桂枝麻黃二湯服麻黃湯之後復有再服桂枝湯之法服桂枝湯之後並無再服麻黃湯

之法更須知太陽爲寒水之經病本寒者較多病標熱者較少若標本兼病亦以熱多寒少爲欲愈治傷寒者當知所重矣此論太陽病以桂枝麻黃二湯爲主一線到底千古註家無此明晰外此亦卽三湯之更進一步非離乎二湯之外而立法也太陽主一身最外一層邪從外來須要驅之使出服上二湯尙不能出或留本經或侵他經必藉少陽之樞轉以達太陽之氣而外出也故小柴胡湯爲太陽篇之要劑今人不知擅改爲少陽主方失之遠矣故無論桂枝證麻黃證若值三日九日十五日少陽主氣之期必藉其樞轉而出或又見往來寒熱樞不轉現出開閤不利之象胸脇苦滿胸乃太陽出入之部脇爲少陽所主之樞默默不欲食心煩默默必神機內鬱而心煩喜嘔不欲食必胃氣不和而喜嘔嘔則逆氣少疎故喜也或涉於心而不涉於胃則胸中煩而不嘔或涉於陽明之燥氣則渴或涉於太陰之脾氣則腹中痛或涉於厥陰之肝氣則脇下痞鞭或涉於少陰之腎氣則心下悸而小便不利或太陽藉少陽之樞轉已有向外之勢則不渴身有微熱或涉於太陰之肺氣則欬者皆以小柴胡爲主而隨其或然之證加減而治之若太陽病過經不解先與小柴胡湯嘔不止心下急鬱微煩與大柴胡湯下之以平其胃則愈凡太陽篇有柴胡之方或因其病象有從樞欲達之意而以柴胡達之因其久鬱未解之邪一得柴胡可以從樞達之無非乘機和導之法亦卽麻黃桂枝二湯進一步之佐也推

而言之太陽之氣外行於胸膈不能外而病於內實則爲大小陷胸湯證虛則爲諸瀉心湯證且太陽之氣上行而至於頭下行而歸於腹不能上而病於下從背而下結於胞室則爲桃仁承氣湯證從胸而下瘀於胞室則爲抵當湯證何莫非桂枝麻黃二湯應用不用或用之失法所致哉蓋太陽經正治法不過二十餘條而已其他則皆權變法斡旋法也假使治傷寒者審其脈之或緩或緊辨其證之有汗無汗則從而汗之解之如桂枝麻黃等法則邪却而病除矣其或合陽明或合少陽或合三陽者則從而解之清之如葛根湯治太陽陽明合病下利葛根加半夏湯治合病不下利而但嘔者黃芩湯治太陽少陽合病而自利黃芩加半夏生薑湯治合病而嘔者如白虎湯治三陽合病其云腹滿者爲陽明經熱合於前也其云身重者爲太陽經熱合於後也其云難以轉側者爲少陽經熱合於側也其云口不仁而面垢者熱合少陽之府也其云譫語者熱合陽明之府也其云遺尿者熱合太陽之府也既審其爲三陽之合又必得自汗出之的證而後用白虎湯之的方斯邪分而病解此爲正治之法顧人氣體有虛實之殊藏府有陰陽之異或素有痰飲痞氣以及咽燥淋瘡汗衄之疾或適當房室金刃產後亡血之餘是雖同爲傷寒之候不得竟用麻桂之法矣於是旋覆代赭石湯治傷寒汗吐下解後心下痞鞭噫氣不除是胃氣弱而未和痰氣動而上逆之證有茯苓桂枝白朮甘草湯治吐下後邪解

而爲飲發之證金匱云膈間支飲其人喘滿心下痞堅又云心下有痰飲胸脇支滿目眩又云其人振振身瞤劇者必有伏飲其云發汗則動經者言無邪可發而反動其經氣也有承氣湯治傷寒六七日不大便頭痛有熱必衄以陽熱太重以此湯承在上之熱氣而使之下也有小建中湯以治傷寒二三日心悸而煩補中氣以生心血有炙甘草湯治脈結代心動悸啟腎陰以行於脈道有四逆湯治發熱頭痛脈反沈身體疼痛扶腎陽以救其虛陷是爲權變之法而用桂枝麻黃等法又不能必其無過與不及之弊或汗出不徹而邪不外散則有傳變他經及發黃蓄血之病如中風以火劫汗則兩陽薰灼其身發黃陽盛則欲衄陰虛則小便難甚則見發噦譫語捻衣摸牀諸危證服藥得小便利者方可治之如桂枝證外不解而熱結膀胱其人如狂血得自下乃愈若小腹急結有桃仁承氣湯之輕攻法如麻黃證表不解脈微而沈其人狂其邪反不結於胸而直下於少腹而鞭滿爲瘀熱在裏又身黃脈沈結小便自利不爲水而爲血其血不能自下必攻而始下又有抵當湯之峻攻法也或汗出過多而并傷其陽氣則有振振擗地肉瞤筋惕爲真武湯之證有發汗後血液內亡身疼痛脈沈遲者爲桂枝加芍藥生薑人參新加湯證有發汗過多虛其心氣其人叉手冒心喜按者爲桂枝甘草湯證有發汗後虛其腎氣臍下悸欲作奔豚爲茯苓桂枝甘草大棗湯證有發汗後傷其中氣不能運行升降而腹脹

滿爲厚朴生薑甘草人參半夏湯證有發汗後反惡寒陰陽兩虛爲芍藥甘草附子湯證且有更發汗
小發汗論中有論而無方亦可以意會之是爲斡旋之法學者宜究心焉



傷寒醫訣串解卷二

陽明篇第二

陽明主裏外候
肌肉內候胃中

閩長樂陳念祖修園著

受業姪道著纂集
東治林壽萱校訂

何謂陽明經證曰身熱目痛鼻乾不得眠反惡熱是也有未罷太陽已罷太陽之辨 若兼見頭痛惡寒

是太陽證未罷自汗脈緩宜桂枝湯項背強八八桂枝加葛根湯主之無汗脈浮宜麻黃湯項背強八

八葛根湯主之 若無頭痛惡寒但見壯熱口渴是已罷太陽爲陽明經之本證宜白虎湯主之

何謂陽明腑證曰潮熱譫語手足腋下澀然汗出腹滿大便鞭是也有太陽陽明少陽陽明正陽陽明之

辨 本太陽證治之失法亡其津液致太陽之熱乘胃燥而轉屬陽明其證小便數大便硬傷寒論謂之

脾約宜麻仁丸 以上言太陽陽明之證也

本少陽病治之失法亡其津液致少陽之邪乘胃燥而轉屬陽明爲大便結燥傷寒論謂爲大便難以

蜜煎膽汁導之 以上言少陽陽明之證也

病人陽氣素盛或有宿食外邪傳入遂歸於胃腑傷寒論謂爲胃家實宜以三承氣湯下之 以上言

正陽陽明之證也

陽明在經未離太陽宜汗之既離太陽宜清之在腑審其輕重宜下之若在經絡之界汗之不可清之不可下之不可宜用吐法柯韻伯云除胃實證其餘如虛熱咽乾口乾口苦舌胎腹滿煩躁不得臥消渴而小便不利凡在胃之外者悉是陽明表證仲景製汗劑是開太陽表邪之出路製吐劑是引陽明表邪之出路使心腹之濁邪上出於口一吐則心腹得舒表裏之煩熱悉除矣煩熱既除則胃外清自不致胃中之實所以爲陽明解表之聖劑

內經云陽明之上燥氣治之所謂本也本之下中之見也見之下氣之標也又曰陽明不從標本從乎中見從中見者以中氣爲化也又曰陽明爲闔又熱病論曰二日陽明受之陽明主肉其脈俠鼻絡於目故身熱目痛而鼻乾不得臥也傷寒多發熱而此獨身熱者蓋陽明主肌肉身熱尤甚也邪熱在胃則煩故不得舒臥也傷寒論云問曰病有太陽陽明有正陽陽明有少陽陽明何謂也答曰太陽陽明者脾約是也本太陽病不解太陽之標熱合陽明之燥熱以致脾之津液爲其所灼而窮約正陽陽明者胃家實是也燥爲陽明之本氣燥氣太過無中見濕土之化而實少陽陽明者發汗利小便胃中燥煩而實大便難是也少陽之上相火治之少陽病誤發汗誤利小便則津液竭而相火熾盛胃中燥實而大便難矣

陽明之爲病胃家實也言陽明病雖有三者之分而其爲胃家實則一也此節爲陽明病之提綱沈堯封